

Pengurusan zakat cekap bantu ekonomi – PM

UM - 14/3/2006

Zakat sebagai salah satu daripada Rukun Islam menjadi institusi penting dalam sistem perekonomian dan sosial ummah

ABDULLAH AHMAD BADAWI
Perdana Menteri

Laporan NORLIZAH ABAS
dan MUSTAFA KAMAL BASRI

KUALA LUMPUR 13 Mac – Datuk Seri Abdullah Ahmad Badawi berkata, pengurusan zakat yang cekap dan berkesan akan memberi manfaat ekonomi dan jaminan sosial yang sepenuhnya kepada mereka yang kurang bernasib baik.

Menurut Perdana Menteri, zakat sebagai salah satu daripada Rukun Islam menjadi institusi penting dalam sistem perekonomian dan sosial ummah.

Sehubungan itu, Abdullah yakin Persidangan Zakat Asia Tenggara 2006 yang akan beliau rasmikan esok mampu membincangkan manfaat zakat secara menyeluruh bagi mencapai resolusi yang bernas.

“Persidangan itu selari dengan hasrat negara-negara Islam untuk meningkatkan kecemerlangan Islam sebagai agama global,” katanya dalam kata-

kata aluan buku cenderamata Persidangan Zakat Asia Tenggara 2006 yang berlangsung di Hotel Grand Seasons di sini.

Persidangan serantau itu yang bertemakan ‘Zakat Memartabatkan Kecemerlangan Ummah’ berjaya me narik penglibatan 200 peserta diadakan selama tiga hari bermula hari ini.

Ia anjuran Jabatan Wakaf, Zakat dan Haji (JWZH), Institut Kajian Zakat Malaysia (IKaZ), Pusat Pungutan Zakat, Majlis Agama Islam Wilayah Persekutuan (PPZMAIWP), Dompot Dhuafa Republika dan Institut Pengurusan Zakat (Indonesia) dengan kerjasama Majlis Agama Islam Singapura dan Majlis Agama Islam Brunei.

Ia antara lain mencadangkan penubuhan sebuah badan serantau sebagai satu forum bagi membincangkan isu-isu kontemporari zakat.

Badan itu akan dianggotai oleh tokoh-tokoh organisasi zakat di Asia Tenggara.



SEBAHAGIAN peserta yang hadir pada Persidangan Zakat Asia Tenggara 2006 di Hotel Grand Seasons, Kuala Lumpur, semalam.